

Venezuela a ofrece combustibel mas barata y transportacion subsidia

Segun Betico Croes a divulga ayera

ORANJESTAD(AAN)—Durante su conferencia di prensa ayera tardi, Sr. Betico Croes a duna di conoce cu na Venezuela cu Aruba a keda desapunta cu Venezuela a trata di trata Shell y p motibonan geo politico y cu pa Lago no tabata tin motibonan geo politico. E contesta tabata cu Shell y Lago ta otro. Shell ta mas moderniza cu Lago, Shell ta produci productonan blanco, mientras cu Lago ta un cafetera, Lago a bira Obsoleto y cu no tin solucion pa Lago.

"Nan a declara cu no por subsidia Exxon, pero si nan ta kere cu nan por duna di pueblo pa pueblo un trato preferencial. Pakico anto te awe pa e uso domestico pa Aruba, Aruba no por a haya trato preferencial, a ser bisa na Venezuela, el a puntra y a haya como contesta cu prijs preferencial no por. Nos a pidi pa considera e uso domestico di Aruba manea e uso domestico di Venezuela y por wordo subsidia di manera cu por haya prijs barata, y e contesta tabata cu legalmente constitucionalmente no por a menos cu Aruba legalmente bay pertence na territorio Venezolano. Ta significa cu pa Aruba por haya un prijs manera uso domestico ta na Venezuela, Aruba mester ta Venesolano. Na momento cu crudo of producto sali for di territorio Venesolano, ta prijs modifica, ta prijs oficial", segun Sr. Betico Croes.

El a sigui bisa cu ora a mustra cifra con halto Aruba ta paga pa gas,

fueloil etc. nan a bisa cu nan tin un oferta pa Aruba, cual ta cu Aruba lo haya prijs oficial cu ta hopi mas abao, tambe cu Aruba lo haya transporte subsidia gratis di Venezuela y e financiamiento Aruba lo haya manera un estilo di pacto.

Sr. Betico Croes a bisa cu a yega na un acuerdo pa manda otro siman pa Venezuela cuatro of cinco tecnico, pa hunto cu Crisanti, Anzola y PDVSA traha un formula y hasta Venezuela a haya e impresion cu ora Aruba a busca Esso Petrolero, cu Aruba a braza Exxon atrobe y laga Venezuela un banda. Aki nan a ser splica cu mester corda cu tin plantanan vital, manera WEB, nos turismo ta vital, uso domestico ta vital, y no por a keda spera 31 di maart pasa y keda bashi y pa garantiza continuidad a yega na un areglo temporal cu Esso Petrolera, pero nan deseo ta cu na momento cu Aruba haya esey na prijs modifica, transporte subsidia, y un estilo di financiamiento di pacto, cu Aruba lo forma su propio compania estatal di manera cu lo no bini un intermedio cu ta gana placa ariba Venezuela ni ariba custia di pueblo di Aruba.

Pa esey e cinco tecnonan, justicanan, lo bay hiba deliberacionnan, pero esey ta si encaso cu Lago ta desaparece y cu Lago ta wordo desmantela, Sr. Betico Croes a laga sa.

Protocol di acuerdo firma cu compania canades cu kier cumpra Lago

Letter of intent a ser ricibi di compania di Houston tambe

ORANJESTAD(AAN)—Durante su conferencia di prensa, Sr. Betico Croes a splica cu diamars Bestuurscollege a yega na un protocol of agreement cu un compania di Canada, y ademas tin un letter of intent y hendenan ta aki di Houston, el a laga sa.

"Mi kier bisa enfaticamente cu mi no kier lanta espectativanan falso, speranza falso. Ami ta keda pesemista. Boso ta corda mi palabranan algun luna pasa? Un porciento tey di posibilidad pero e porciento ey nos ta bay explote a fondo pasobra pa nos tuma e decision cu Lago ta wordo desmantela cu hamas Aruba lo tin un refineria, lo ta un decision enorme pisa. Pesey nos a keda duna e otro gruponan cu a mantene dialogo e benefi-

cio di duda y nos a keda reuni, y te na e momento aki ainda nan mester bay demostra", el a laga sa.

Segun Sr. Betico Croes, e momento ta yegando cu decision mester cay y si resulta fin di september cu verdaderamente un di e companianan aki por salba e refineria aki, e ta kere cu ta bendicion di mas grandi cu por a drama ariba Aruba y e ora ey e recomendacionnan di IMF ta pa un non Lago Situation. "E recomendacionnan di IMF ta pa e situacion cu LAGO no ta existi. Si Lago lo mester habri su porta back, locual lo dura lunas y aunque kizas te otro aña, y e intencion di un grupo ta pa nan habri esaki dia 31 di maart, esaki lo ta un bendicion pa Aruba.

Yudanza presupuestario ta 100 millon pa e gobierno actual

ORANJESTAD(AAN)—Relaciona cu declaracion di Minister de Koning manera un comunicado di Gobierno di Aruba a menciona, cu gobierno di Hulanda solamente lo yuda Aruba cu ayudo presupuestario si Aruba acepta e medidanan di IMF, Mr. Henny Eman, lider di AVP tambe a duna su punto di vista.

El a laga sa cu e noticia ta corecto paso-Hulanda a bisa AVP tambe cu e no ta duna e bestuurscollege actual mas di 100 millon florin.

Esaki ta pa Aruba purba sobrevivi den e periodo venidero.

El a laga sa cu AVP a haya copia di e telex tambe y cu de Koning a contesta gobierno cu e tin un convenio cu Gobierno cu gobierno ta bay ehecuta IMFanto basa ariba ehecucion di IMF Hulanda ta

duna 100 millon so.

"Partido AVP ta referi na conversacion cu AVP y ADN tabata tin cu De Koning caminda a ser bisa cu e dos partidonan aki no ta di acuerdo cu e rapport di IMF, tambe cu si un gobierno nobo sinta manian y bin cu plan nobo y ariba nivel mas halto cu esun di IMF, si Hulanda ta dispuesto pa evalua e suma cu el a priminti gobierno di Aruba. E ora Sr. de Koning a contesta cu Hulanda ta dispuesto a base di e plan nobo evalua un otro suma", el a laga sa.

Sr. Eman a bisa cu e telex cu a ser manda pa gobierno ta confirma locual AVP a bisa den Eilandsraad cu Hulanda no ta bay duna e gobierno aki, mas di 100 millon, pasobra tin un convenio cu

Sigui lesa pag. 4

Sindicationan di douaneronan kier investigacion pa señal fraude insinua

ORANJESTAD(AAN)—Sindicato Adouanero di Aruba, SADA, a protesta contra expresionnan haci contra e cuerpo di douaneronan y ta menciona cu durante ultimo reunion sosteni cu Sres. Hendrik Croes y Tjon A loi, nan a tende diferente insinuacion lanza contra cuerpo di Adouana pa asina justifica e mutacionnan den e cuerpo.

Segun SADA nan a spera di haya algun aclaracion ariba e puntonan cual nan a pidi Mr. Hendrik Croes pa papia cu Sr. de Paula, y cu nan a keda desapunta pasobra Sr. Croes no a bini cu nada nobo.

"Al contrario, nos a wordo bofta cu insinuacionnan manera: "De douane zowel op Curacao als op Aruba is een wespennet. De organisatie van de Douane laat fraude toe. De douane is een chaos. Zonder mutaties laar je de mogelijkheid voor fraude open".

"Cu otro palabra actualmente tin fraude na Douane, pesey mester haci mutacion. SADA ta protesta energicamente contra tur esaki pa motibo cu e impresin a wordo crea cu tur e douaneronan tanto na Curacao como na Aruba, cualnan a wordo muta, ta cometiendo fraude, pesey mester a introduci mutacionnan", segun SADA.

SADA ta exige di gobierno un declaracion bon cla ariba e asunto aki y si acaso tin indicacion di fraude den e cuerpo anto SADA ta exige di gobierno un investigacion profundo. E sindicato ta sigui bisa cu si tin culpabel, señala nan y castiganan cu tur peso di ley pasobra SADA no ta acepta cu e cuerpo di Douaneronan den su totalidad ta ser acusa di fraude.

SADA ta mustra cu nan no ta contra mutacionnan ariba su mes, pero cu nan mester sosode na un manera responsabel y no manera nan a wordo introduci actualmente. "Nos no por ehecuta trabao nan den funcion ariba nos rango sin compensacion Den pasado esaki a sosode pa hopi aña sin cu douaneronan a wordo compensa, segun e ley di compensacion, segun SADA a laga sa.